

**D.R. 20/2021**

**RANG UNDANG-UNDANG**

*b e r n a m a*

Suatu Akta untuk meminda Akta Pencegahan dan Pengawalan Penyakit Berjangkit 1988.

[ ]

**DIPERBUAT** oleh Parlimen Malaysia seperti yang berikut:

**Tajuk ringkas dan permulaan kuat kuasa**

1. (1) Akta ini bolehlah dinamakan Akta Pencegahan dan Pengawalan Penyakit Berjangkit (Pindaan) 2021.

(2) Akta ini mula berkuat kuasa pada tarikh yang ditetapkan oleh Menteri melalui pemberitahuan dalam *Warta*.

**Pindaan seksyen 2**

2. Akta Pencegahan dan Pengawalan Penyakit Berjangkit 1988 [Akta 342], yang disebut “Akta ibu” dalam Akta ini, dipinda dalam seksyen 2—

(a) dengan memotong takrif “inspektor kesihatan”;

- (b) dalam takrif “pegawai diberi kuasa”, dengan menggantikan perkataan “mana-mana inspektor kesihatan, atau mana-mana pegawai” dengan perkataan “mana-mana Pegawai Kesihatan Persekitaran, atau mana-mana orang yang sesuai”;
- (c) dalam takrif “Pegawai Kesihatan”—
- (i) dengan menggantikan perkataan “dan pelabuhannya” dengan perkataan “, pelabuhan dan sempadan daratnya”; dan
  - (ii) dengan menggantikan perkataan “Timbalan Ketua Pengarah Kesihatan, Pengarah Perkhidmatan Kesihatan, mana-mana Timbalan Pengarah Perkhidmatan Kesihatan, mana-mana Pengarah Perkhidmatan Perubatan dan Kesihatan Negeri, mana-mana Timbalan Pengarah Perkhidmatan Perubatan dan Kesihatan Negeri, Pengarah Perkhidmatan Perubatan Negeri Sabah dan Timbalannya dan Pengarah Perkhidmatan Perubatan Negeri Sarawak dan Timbalannya” dengan perkataan “mana-mana Timbalan Ketua Pengarah Kesihatan, Pengarah Kawalan Penyakit, mana-mana Timbalan Pengarah Kawalan Penyakit, Pengarah Kesihatan Negeri dan mana-mana Timbalan Pengarah Kesihatan Negeri”; dan
- (d) dengan memasukkan selepas takrif “Pegawai Kesihatan” takrif yang berikut:
- ‘ “Pegawai Kesihatan Persekitaran” ertinya mana-mana Pegawai Kesihatan Persekitaran dalam perkhidmatan Kerajaan atau mana-mana pihak berkuasa tempatan termasuk Penolong Pegawai Kesihatan Persekitaran;’.

### **Pindaan seksyen 10**

#### **3. Subseksyen 10(2) Akta ibu dipinda—**

- (a) dengan memasukkan selepas perkataan “atau mendapat tahu” perkataan “atau mempunyai sebab untuk percaya atau mengesyaki”; dan

- (b) dengan menggantikan perkataan “dalam borang yang ditetapkan oleh peraturan-peraturan yang dibuat di bawah Akta ini” dengan perkataan “dalam apa-apa bentuk sebagaimana yang ditentukan oleh Ketua Pengarah”.

#### **Seksyen baharu 14A**

4. Akta ibu dipinda dengan memasukkan selepas seksyen 14 seksyen yang berikut:

**“Pengasingan atau pengawasan orang yang dijangkiti dan orang yang disyaki**

**14A.** (1) Seseorang pegawai diberi kuasa boleh memerintahkan supaya mana-mana orang yang dijangkiti atau yang dia mempunyai sebab untuk percaya telah dijangkiti oleh sesuatu penyakit berjangkit untuk menjalani pengasingan atau pengawasan di mana-mana tempat dan bagi apa-apa tempoh yang difikirkannya patut atau sehingga dia boleh dilepaskan tanpa membahayakan orang ramai.

(2) Bagi maksud subseksyen (1), seseorang pegawai diberi kuasa boleh menggunakan kekerasan yang perlu untuk memastikan perintahnya dipatuhi.”.

#### **Seksyen baharu 15A**

5. Akta ibu dipinda dengan memasukkan selepas seksyen 15 seksyen yang berikut:

**“Perintah untuk memakai atau menggunakan peranti pengesanan, dsb.**

**15A.** (1) Seseorang pegawai diberi kuasa boleh mengeluarkan apa-apa perintah, bagi maksud pengesanan, kepada mana-mana orang yang dijangkiti atau yang dia mempunyai sebab untuk percaya telah dijangkiti, atau mana-mana kontak.

(2) Perintah yang disebut dalam subseksyen (1) boleh termasuk suatu perintah untuk memakai atau menggunakan suatu peranti pengesanan atau apa-apa bentuk peranti pengesanan sebagaimana yang ditentukan oleh pegawai diberi kuasa itu.”.

**Seksyen baharu 21A**

6. Akta ibu dipinda dengan memasukkan selepas seksyen 21 seksyen yang berikut:

**“Arahan Ketua Pengarah**

**21A.** (1) Ketua Pengarah boleh mengeluarkan apa-apa arahan mengikut apa-apa cara, sama ada secara am atau khusus, kepada mana-mana orang atau golongan orang supaya mengambil apa-apa langkah bagi maksud mencegah dan mengawal apa-apa penyakit berjangkit.

(2) Mana-mana orang yang melanggar mana-mana arahan Ketua Pengarah yang dikeluarkan di bawah subseksyen (1) melakukan suatu kesalahan.”.

**Bahagian baharu IVA**

7. Akta ibu dipinda dengan memasukkan selepas Bahagian IV bahagian yang berikut:

**“BAHAGIAN IVA****PENGUATKUASAAN****Kuasa penyiataan**

**21B.** Seseorang pegawai diberi kuasa hendaklah mempunyai segala kuasa yang perlu untuk menjalankan penyiataan di bawah Akta ini mengikut Kanun Tatacara Jenayah [*Akta 593*].

**Kuasa untuk memberikan maklumat**

**21C.** Seseorang pegawai diberi kuasa boleh menghendaki mana-mana orang untuk memberikan apa-apa maklumat yang berhubungan dengan pencegahan dan pengawalan penyakit berjangkit.”.

**Seksyen baharu 22A**

8. Akta ibu dipinda dengan memasukkan selepas seksyen 22 seksyen yang berikut:

**“Kesalahan oleh pertubuhan perbadanan**

**22A.** (1) Jika sesuatu pertubuhan perbadanan melakukan suatu kesalahan di bawah Akta ini, mana-mana orang yang pada masa pelakuan kesalahan itu ialah seorang pengarah, ketua pegawai eksekutif, ketua pegawai operasi, pengurus, setiausaha atau pegawai lain yang seumpamanya bagi pertubuhan perbadanan itu atau yang berupa bertindak atas mana-mana sifat sedemikian atau yang mengikut apa-apa cara atau sehingga apa-apa takat bertanggungjawab bagi pengurusan apa-apa hal ehwal pertubuhan perbadanan itu atau yang membantu dalam pengurusan sedemikian—

- (a) boleh dipertuduh secara berasingan atau bersejajir dalam prosiding yang sama bersekali dengan pertubuhan perbadanan itu; dan
- (b) jika pertubuhan perbadanan itu didapati bersalah melakukan kesalahan itu, hendaklah disifatkan bersalah melakukan kesalahan itu melainkan jika, dengan mengambil kira jenis fungsinya atas sifat itu dan segala hal keadaan, dia membuktikan—
  - (i) bahawa kesalahan itu telah dilakukan tanpa pengetahuan, persetujuan atau pembiarannya; dan
  - (ii) bahawa dia telah mengambil segala langkah yang munasabah dan telah menjalankan segala usaha wajar untuk mengelakkan pelakuan kesalahan itu.

(2) Jika mana-mana orang di bawah Akta ini boleh dikenakan apa-apa hukuman atau penalti bagi perbuatan, peninggalan, pengabaian atau keingkaran, dia boleh dikenakan hukuman atau penalti yang sama bagi tiap-tiap perbuatan, peninggalan, pengabaian atau keingkaran mana-mana pekerja atau ejennya, atau pekerja ejen itu, jika perbuatan, peninggalan, pengabaian atau keingkaran itu telah dilakukan—

- (a) oleh pekerja orang itu dalam masa penggajiannya;
- (b) oleh ejen itu semasa bertindak bagi pihak orang itu; atau

- (c) oleh pekerja ejen itu dalam masa penggajian pekerja itu dengan ejen itu atau selainnya bagi pihak ejen yang bertindak bagi pihak orang itu.”.

### **Penggantian seksyen 24**

9. Akta ibu dipinda dengan menggantikan seksyen 24 dengan seksyen yang berikut:

#### **“Penalti am**

24. Mana-mana orang yang melakukan suatu kesalahan di bawah Akta ini yang tiada penalti diperuntukkan dengan nyata boleh, apabila disabitkan—

- (a) dalam hal seseorang itu merupakan seorang individu, didenda tidak melebihi satu ratus ribu ringgit atau dipenjarakan selama tempoh tidak melebihi tujuh tahun atau kedua-duanya; atau
- (b) dalam hal sesuatu pertubuhan perbadanan, didenda tidak melebihi dua juta ringgit.”.

### **Penggantian seksyen 25**

10. Akta ibu dipinda dengan menggantikan seksyen 25 dengan seksyen yang berikut:

#### **“Pengkompunan kesalahan**

25. Ketua Pengarah atau mana-mana pegawai diberi kuasa yang diberi kuasa bagi maksud ini oleh Ketua Pengarah secara bertulis boleh, dengan keizinan secara bertulis Pendakwa Raya, pada bila-bila masa sebelum sesuatu pertuduhan dimulakan, mengkompau mana-mana kesalahan di bawah Akta ini atau mana-mana peraturan-peraturan yang dibuat di bawah Akta ini yang telah ditetapkan oleh peraturan-peraturan sebagai suatu kesalahan yang boleh dikompau dengan membuat suatu

tawaran bertulis kepada orang yang disyaki dengan munasabah telah melakukan kesalahan itu untuk mengkompaun kesalahan itu apabila dibayar kepada Ketua Pengarah—

- (a) dalam hal seseorang itu merupakan seorang individu, suatu jumlah wang yang tidak melebihi sepuluh ribu ringgit; atau
- (b) dalam hal sesuatu pertubuhan perbadanan, suatu jumlah wang yang tidak melebihi satu juta ringgit.”.

### **Pindaan seksyen 31**

**11.** Seksyen 31 Akta ibu dipinda dengan memasukkan selepas subseksyen (2) subseksyen yang berikut:

“(3) Peraturan-peraturan yang dibuat di bawah Akta ini boleh menetapkan apa-apa perbuatan yang melanggar peraturan-peraturan itu menjadi suatu kesalahan dan boleh menetapkan penalti denda tidak melebihi lima puluh ribu ringgit atau pemenjaraan selama tempoh tidak melebihi dua tahun atau kedua-duanya.”.

---

### HURAIAN

Rang Undang-Undang ini bertujuan untuk meminda Akta Pencegahan dan Pengawalan Penyakit Berjangkit 1988 (“Akta 342”).

2. *Fasal 1* mengandungi tajuk ringkas dan peruntukan mengenai permulaan kuat kuasa Akta yang dicadangkan.

3. *Fasal 2* bertujuan untuk meminda takrif “pegawai diberi kuasa” dan “Pegawai Kesihatan” untuk mengemas kini jawatan tertentu mengikut skim perkhidmatan semasa.

4. *Fasal 3* bertujuan untuk meminda seksyen 10 Akta 342 untuk menghendaki tiap-tiap pengamal perubatan yang mempunyai sebab untuk percaya atau mengesyaki wujudnya apa-apa penyakit berjangkit untuk memberikan notis dalam apa-apa bentuk sebagaimana yang ditentukan oleh Ketua Pengarah.

5. *Fasal 4* bertujuan untuk memasukkan seksyen baharu 14A ke dalam Akta 342 untuk memberikan kuasa kepada seseorang pegawai diberi kuasa untuk memerintahkan supaya mana-mana orang yang dijangkiti atau yang dia mempunyai sebab untuk percaya telah dijangkiti oleh sesuatu penyakit berjangkit untuk menjalani pengasingan atau pengawasan di mana-mana tempat dan bagi apa-apa tempoh yang difikirkan patut olehnya atau sehingga dia boleh dilepaskan tanpa membahayakan orang ramai.

6. *Fasal 5* bertujuan untuk memasukkan seksyen baharu 15A ke dalam Akta 342 untuk memberikan kuasa kepada seseorang pegawai diberi kuasa untuk mengeluarkan apa-apa perintah kepada mana-mana orang yang dijangkiti atau yang dia mempunyai sebab untuk percaya telah dijangkiti, atau mana-mana kontak, untuk memakai atau menggunakan apa-apa peranti pengesanan atau apa-apa bentuk peranti pengesanan sebagaimana yang ditentukan oleh pegawai diberi kuasa.

7. *Fasal 6* bertujuan untuk memasukkan seksyen baharu 21A ke dalam Akta 342 untuk memberi Ketua Pengarah kuasa untuk mengeluarkan apa-apa arahan mengikut apa-apa cara kepada mana-mana orang atau golongan orang supaya mengambil apa-apa langkah bagi maksud mencegah dan mengawal apa-apa penyakit berjangkit.

8. *Fasal 7* bertujuan untuk memasukkan Bahagian baharu IVA ke dalam Akta 342 untuk mengadakan peruntukan bagi kuasa penguatkuasaan di bawah Akta 342.

Seksyen baharu 21B yang dicadangkan memberikan kuasa kepada seseorang pegawai diberi kuasa untuk menjalankan penyiasatan di bawah Akta 342 mengikut Kanun Tatacara Jenayah [*Akta 593*].

Seksyen baharu 21C yang dicadangkan memberikan kuasa kepada seseorang pegawai diberi kuasa untuk menghendaki mana-mana orang untuk memberikan apa-apa maklumat yang berhubungan dengan pencegahan dan pengawalan penyakit berjangkit.

9. *Fasal 8* bertujuan untuk memasukkan seksyen baharu 22A ke dalam Akta 342 untuk mengadakan peruntukan bagi kesalahan yang dilakukan oleh suatu pertubuhan perbadanan di bawah Akta 342.

10. *Fasal 9* bertujuan untuk meminda seksyen 24 Akta 342 untuk mengadakan peruntukan bagi penalti am bagi apa-apa kesalahan yang dilakukan di bawah Akta 342.

11. *Fasal 10* bertujuan untuk meminda seksyen 25 Akta 342 untuk memberi Ketua Pengarah atau mana-mana pegawai diberi kuasa yang diberi kuasa olehnya kuasa untuk menawarkan kompaun bagi mana-mana kesalahan boleh kompaun di bawah Akta 342 atau mana-mana peraturan-peraturan yang dibuat di bawah Akta 342.

12. *Fasal 11* bertujuan untuk meminda seksyen 31 Akta 342 untuk menetapkan apa-apa perbuatan yang melanggar peraturan-peraturan menjadi suatu kesalahan dan boleh menetapkan penalti denda tidak melebihi lima puluh ribu ringgit atau pemenjaraan selama tempoh tidak melebihi dua tahun atau kedua-duanya.

13. Pindaan lain yang tidak diperkatakan secara khusus dalam Huraian ini merupakan pindaan kecil atau berbangkit.



*Pencegahan dan Pengawalan Penyakit Berjangkit* 9  
*(Pindaan)*

*IMPLIKASI KEWANGAN*

Rang Undang-Undang ini akan melibatkan Kerajaan dalam perbelanjaan wang tambahan yang amaunnya belum dapat ditentukan sekarang ini.

[PN(U2)3293]